

Morning Dogri (NSD) National News Bulletin 31-05-2024

आकाशवाणी

- लोकसभा दे 7में ते खीरले गेड़ दे मतदान लेई सब्बै तैआरियां मुकम्मल करी लैती गेइयां न। 57 संसदी हल्के च कल इस गेड़ तैहत वोट पाए जांगन
- यौन उत्पीड़न दे आरोपें दा सामना करै करदे हसन हल्के दे सांसद प्रजबल खन्ना गी बैंगलुरु थमां गिरफ्तार करी लैता गोआ ऐ।
- छत्तीसगढ़ दे बीजापुर जिले दिएं बक्ख-बक्ख थाहरें थमां सुरक्षाबलें 16 मोआवादिएं गी गिरफ्तार कीता ऐ।
- मणिपुर च हाड़ेंद । कैहर बरोबर जारी ऐ। मौसम विभाग नै अगले दो दिन मणिपुर च भारी थमां मती भारी बरखा दे असार जताए न।
- बैकाक च विश्व ओलंपिक मुक्केबाजी क्वालीफायर च भारती खडारी अगले राउंड च पुज्जी गे न।



7th Phase

लोकसभा चुनावं दे 7में ते खीरले गेड़ तैहत कल वोट पाए जांगन। 8एं राज्यें ते केन्द्र शासत प्रदेश दी 57 लोकसभा सीटें लेई कल मतदान होग। इस गेड़ च उत्तर प्रदेश ते पंजाब दी 13-13 सीटें, पच्छिम बंगाल दी 9, बिहार दी 8, ओडिशा दी 6, हिमाचल प्रदेश दी 4, झारखंड दी 3 ते चंडीगढ़ दी इक सीट पर वोट पाए जांगन। वोट पाने आला कम्म बडलै 7 बजे शुरू होग। केई सारे नेताएं दे सियासी भविक्ख दा फैसला कल ईवीएम च बंद होई जाग। इनें मेदवारें च बीजेपी दे वरिष्ठ नेता नरेन्द्र मोदी ते अनुराग सिंह ठाकुर, कांग्रेस दे विक्रम आदित्य सिंह, टीएमसी नेता अभिषेक बनर्जी होर शामिल न। मतदान प्रक्रिया गी सुचारू ते रमानदारी आले ढंगै सिर करोआने लेई चुनावं आयोग आस्सेआ व्यापक इंतजाम कीते गे न। मतदाताएं लेई मतदान केन्द्रें पर बुनियादी सहूलतां जियां पीने आला पानी, शौचालय, व्हील चेयर, बिजली बगैरा दी बवस्था कीती गोदी ऐ तां जे हर मतदाता गी असानी होई सकै।

प्रदेश चुनां सरबंधी अफसर, जिला चुनां अधिकारी ते होरने सरबंधी अमले गी हिदायत दिक्ती
गेई ऐ जे ओह गर्मी दे मौसम गी दिक्खदे होई लोड्चदे बंदोबस्त करियै रखन। मतदान
केन्द्रें पर सुरक्षा बंदोबस्तें गी निग्गर बनाया गेआ ऐ तां जे कुसै बी माडी घटना गी रोकेआ
जाई सकै ते चुनां प्रक्रिया गी आताद ते निरपक्ख ढंगै सिर तोड़ चाढ़ेआ जाई सकै।

<><><><><><><>

Prajwal

यौन उत्पीड़न दे आरोपें दा सामना करै करदे हासन हल्के दे सांसद प्रजवल खन्ना गी
बैंगलुरु दे केस्पेगोड़ा अंतराश्ट्रीय ब्हाई अड्डे पर उतरदे गै गिरफ्तार करी लैता गेआ।
इंटरपोल थमां जानकारी थहोने परैत कर्नाटक पुलस दी विशेष जांच टीम बैंगलुरु पुलस ते
इमीग्रेशन अधिकारिएं खन्ना होरें गी ब्हाई अड्डे पर गै गिरफ्तार करने दी तैआरी करी रखी
दी ही। खन्ना गी उंदे घर कम्म करने आली इक महिला दी यौन उत्पीड़न ते अपराधिक
धमकी दे आरोपें दी शकैत पर पुलस दी विशेष जांच टीम दा सामना करना पेई सकदा ऐं
जनता दल सेक्यूलर थमां मुअत्तल कीते गेदे नेता प्रजवल खन्ना नै हासन संसदी हल्के च
मतदान दे इक दिनै परैत यानि 27 अप्रैल गी देश छोड़ी दिक्ता हा।

<><><><><><><>

Chattisgarh

छत्तीसगढ़ दे बीजापुर जिले दिऐं बक्ख-बक्ख थाहरें थमां सुरक्षाबलें 16 माओवादिऐं गी
हिरासत च लैता ऐ। इंदे चा 11 मोआवादिऐं गी बीजापुर पुलस थाने हेठ औंदे गोरना
पडियार-पाड़ा इलाके शा गिरफ्तार कीता गेदा ऐ, जदके 5 माओवादिऐं गी उसुर पुलस थाने
हेठ औंदे भूसापुर इलाके थमां हिरासत च लैता गेआ। पुलस नै दावा बन्नेआ जे गिरफ्तार
कीते गेदे माओवादिऐं आईईडी धमाकें सनें सुरक्षाबलें दी आओजाई रोकने लेई शिडकें गी
पुट्टी सुट्टने दे मामले च शामिल न।

<><><><><><><>

Manipur-Floods

मणिपुर च हाडें दा प्रकोप बरोबर जारी ऐ ते इम्फाल शहर नै हाडें दी सब्बने शा मती मार ढल्ली ऐ। इम्फाल कस्बे बक्खी जाने आली मती सारी शडकें पर पानी भरोची गेदा ऐ। राजभवन ते एह्दे आले दुआले दे इलाकें च बी पानी भरोचे दा ऐ। मणिपुर पुलस, फौज, असम राईफल्स, एनडीआरएफ ते एसडीआरएफ गी बचाह अभियान लेइ लाया गेदा ऐ ते तकरीबन 800 लोकें गी सुरक्षत थाहरें पर पजाई दितता गेदा ऐ। सेनापती जिले च दरेया च डुबबी दी इक महिला दी लोथ बरामद कीती गई ऐ। जिले च हाडेंदी मारै हेठ आए दे परोआर लेई पैहले गै 3 आरजी कैंप खोले गेदे न। राज्य च बने दे हालात गी दिखदे होई सरकारै उत्थें अज्ज ते कल छुट्टी दा ऐलान कीते दा ऐ। सब्बने शिक्षा इदारें गी कल पैहली जून गी तगर बंद रखने दे बी आदेश न। तोआई मोसम विभाग ने अगले दऊं दिनें दरान मणिपुर च भारी थमां बड़ी भारी बरखा दे असार जताए दे न।

<><><><><><>

Boxing

थाईलैंड दे बैंकाक च विश्व ओलंपिक मुक्केबाजी क्वालीफायर च 60 किलोग्राम भार वर्ग च भारत दे अंकूसिता बोरो नै कजाकिस्तान दे मुक्केबाज गी 4-1 कन्नै हराइयै क्वार्टर फाइनल च अपनी थाहर पक्की करी लैती ऐ। तोआई 71 किलोग्राम भार वर्ग च निशांत देव होरें बी थाईलैंड दे खडारी गी 5-0 कन्ने हराइयै क्वार्टरफाइनल च थाहर बनाई लैती ऐ। एह्दे शा पैहले अरूपति चौधरी होरें 66 किलोग्राम भार वर्ग च जित्त दर्ज करियै प्री-क्वार्टर फाइनल च थाहर पक्की करी लैती।

<><><><><><>

MEA

भारतीय वर्ग दे लोक जेह्ड़े विदेश च कम्म करा'रदे न, उंदी गतिशीलता ते रोजगार गी बढ़ावा देने आस्तै विदेश मंत्रालय इलैक्ट्रानिक्स एंड इंफोरमेशन टेक्नालोजी मंत्रालय तैहत सीएससी e-govt सर्विसिस इंडिया लिमिटेड नै इक त्रैयक्षिय समझौता कीता ऐ।

इक सोशल मीडिया पोस्ट दे राएं विदेश मंत्रालय दे प्रवक्ता रंधीर जेसवाल होरें गलाया ऐ जे मंत्रालय दा e-Migrate पोर्टल पूरे मुखै च 5 लख कोला मते सीएससीएं कन्नै जोड़ेआ गेदा ऐ।

<><><><><><>

PM

बीजेपी दे वरिष्ठ नेता ते प्रधानमंत्री नरेन्द्र मोदी होरें कल संजा कण्याकुमारी दे विवेकानंद मैमोरियल च ध्यान लाना शुरू कीता। ध्यान लाने कोला पैहले उनें उत्थुं दे भगवती अमन मंदर च मत्था टेकेआ। उनेंगी उस मंदर च पूर्ण कुम्भ कन्नै सम्मानित कीता गेआ जेह्दे परेंत ओह एम.एल.विवेकानंद समुंद्री जहाज च विवेकानंद मैमोरियल च जाई पुज्जे। मोदी होर उत्थें पैहली जून तोड़ी ध्यान लांगन। एह्दे परेंत ओह विवेकानंद मैमोरियल कन्नै लगदे 133 फुट लम्मे तिरुवतलुवर स्तंभ गी पुष्पांजलि देइयै उस्सै दिन दिल्ली आई पुज्जगंन। प्रधानमंत्री हुंदे औने कन्नै उत्थें समुंद्री सुरक्षा कड़ी करी दितती गई ऐ।

<><><><><><>

Akhnoor Accident

जम्मू दे अखनूर च कल होए दे बस हादसे च मरने आलें दी गिनतरी 22एं तोड़ी जाई पुज्जी ऐ। हादसे च घायल होए दे 57 जनें दा एसडीएच अखनूर ते जीएमसी अस्पताल जम्मू च इलाज चला करदा ऐ। आकाशवाणी दे जम्मू संवाददाता नै खबर दित्ती ऐ जे एह हादसा उसलै होआ जिसलै उत्तर प्रदेश ते राजस्थान थमां यात्रए गी रियासी जिले च शिव खोड़ी लेइयै जा करदी इक बस डूहंगे नाले च रूलकी पेई। एह हादसा जम्मू जिले दे अखनूर इलाके च चौकी चौरा बेल्ट दे टुंगी मोड़ थाहर होआ। हादसे दे तुरत मगरा मकामी लोक, पुलस ते फौज मौके पर पुज्जी गई ते बचाह कारवाई शुरू कीती। ट्रैफिक पुलस दे एसएसपी, ट्रांसपोर्ट कमीशनर ते होर अधिकारी बी मौके पर पुज्जी गे। जम्मू दे डिवीजनल कमीशनर ते एडीजीपी जम्मू संजा चिरें जनेई जीएमसी अस्पताल जम्मू पुज्जे ते घायलें दी डोल पुच्छी। तोआई जम्मू दे जिला मैजिस्ट्रेट होरें हादसे दी मैजिस्ट्रियल जांच कराने दे आदेश दित्ते न।

बस हादसे बारे कोइ सुआल जां सहायता लेई नंबर जारी कीते गे न। डी.एमदफतर दे नंबर न 96226-99666 ते 94191-60547, एस.पी दफतर दे नंबर न 94191-72197, 94191-94102 ते मैडिकल सरबंधी नंबर च 94191-90500, 94191-90493।

<><><><><><>

President-VP-PM

राश्ट्रपति, उपराश्ट्रपति ते प्रधानमंत्री होरें अखनूर च होए दे बस हादसे च जानी नुक्सान पर दुख जाहर कीता ऐ। राश्ट्रपति द्रौपदी मुर्मू होरें आखेआ ऐ जे बस हादसे च जानी नुक्सान होने पर उनेंगी दुख पुज्जेआ ऐ। उनें हादसे च घायल होए दे लोकें दी तौले नरोए होने दी कामना कीती ऐ। उपराश्ट्रपति जगदीप धनखड़ होरें आखेआ जे दुखदारी बस हादसे बारे पता लगने मगरा उनेंगी डूहंगा दुख पुज्जा ऐ। प्रधानमंत्री नरेन्द्र मोदी होरें मरने आलें दे परोआर आले कन्नै डूहंगा बसोस प्रकट कीता ते उंदे परोआर आलें लेईदो-दो लक्ख ते घायलें गी 50-50 जहार रपे दी फौरी मदाद देने दी घोशणा कीती। प्रधानमंत्री हुंदे दफतरै च राज्यमंत्री डॉ. जितेन्द्र सिंह होरें बी हादसे पर बसोस प्रकट कीता ऐ।

<><><><><><>